

Икки томонлама ҳамкорлик масалалари муҳокама қилинди

Фарғонада Ўзбекистон Республикаси Бош вазири Абдулла Арипов Тожикистон Республикаси Бош вазири Қоҳир Расулзода бошчилигидаги ушбу мамлакат делегацияси билан учрашди. Унда икки давлат вазирлик ва идоралари, иқтисодий тузилмалари раҳбарлари иштирок этди. Учрашувда икки томонлама муносабатларнинг долзарб масалалари, бўлажак олий даражадаги Ўзбекистон – Тожикистон учрашувига тайёргарликнинг бориши муҳокама қилинди. Мамлакатларимиз ўртасидаги ўзаро ҳамкорлик халқларимизнинг узоқ муддатли манфаатларига жавоб берадиган, Марказий Осиё минтақасида тинчлик, барқарорлик, хавфсизлик ва изчил ривожланишни таъминлашда асосий омил бўладиган даражага кўтарилимоқда. Президентимиз Шавкат Мирзиёевнинг шу йил март ойида Тожикистонга давлат ташрифи мамлакатларимиз ўртасидаги ҳамкорлик муносабатларини янги босқичга кўтарди. Унда сиёсий, савдо-иктисодий, маданий-гуманитар соҳалардаги ҳамкорликни мустаҳкамлаш бўйича муҳим келишувларга эришилди. Кейинги пайтларда барча соҳаларда ҳамкорлик кенгаймоқда. Жорий йилнинг биринчи ярмида ўзаро савдо айланмаси ўтган йилга нисбатан 35 фоизга ўсгани бу борадаги ишларнинг амалдаги ифодасидир. Учрашувда икки мамлакат иқтисодиёти бир-бирини тўлдириши ва соғлом рақобат юзага келишида яқин қўшничилик ва транспорт қатновининг арzonлиги муҳим аҳамиятга эга экани таъкидланди. Савдо-иктисодий ва инвестициявий соҳаларда ҳамкорликни янада фаоллаштириш мақсадида ишбилармонлар кенгашининг навбатдаги йиғилишини ўтказиш ҳамда икки мамлакат ҳудудида ишбилармонлар фаолияти учун мақбул шароитлар яратишга келишиб олинди. Томонлар март ойида Душанбеда имзоланган келишувлар ва Президентимизнинг Тожикистонга давлат ташрифи якунлари бўйича имзоланган шартномалар ижросига ҳам алоҳида эътибор қаратди. Тожикистон Республикаси Президенти Имомали Раҳмоннинг мамлакатимизга ташрифи арафасида Тошкент шаҳрида “Тожикистонда ишлаб чиқарилган” миллий маҳсулотлар кўргазмаси ҳамда Ўзбекистон –Тожикистон бизнес форумининг ўтказилиши қўллаб-қувватланди. Ижтимоий-маданий соҳалардаги ҳамкорлик азалдан дўст ва яқин қўшни бўлган ўзбек-тоҷик халқларининг дўстлигини янада мустаҳкамлашга хизмат қилаётгани таъкидланди. Икки томонлама алоқаларни янада мустаҳкамлаш, амалий ва самарали натижадорликни ошириш учун барча чора-тадбирлар кўрилади. Бош вазирлар бўлажак олий даражадаги Ўзбекистон – Тожикистон учрашуви ўзаро ҳамкорлик муносабатларини янги босқичга кўтариш, мамлакатларимиз ва халқларимиз ўртасидаги манфаатли ҳамкорликни янада ривожлантиришнинг янги истиқболларини очишига ишонч билдирилар.

Маъсурджон Сулаймонов, Аъло Абдуллаев (сурат) ЎзА

2018-07-17 08:56:41